



Број/Број: 01/6а-50-3-6-9/16  
Сарајево/Sarajevo, 11.4.2016.

## ZAPISNIK

### s konsultativnog sastanka održanog 11.4.2014. u PSBIH

Sastanak je s početkom u 14 sati održan na traženje Povjerenstva, a organiziralo ga je Ministarstvo civilnih poslova BiH, u vezi sa Prijedlogom okvirnog zakona o liječenju neplodnosti biomedicinski potpomognutom oplodnjom.

Sastanku su prisustvovali ispred Povjerenstva: Mirsad Isaković (predsjedao sastankom), Maja Gasal-Vražalica i Diana Zelenika.

Ispred Ministarstva civilnih poslova BiH učestvovali su: Draženka Malićbegović, Sektor za zdravstvo, pomoćnica ministra, Šerifa Godinjak, Sektor za zdravstvo, Odsjek za evropske integracije i međunarodnu saradnju, šefica Odsjeka i Indira Hodžić, Sektor za zdravstvo, Odsjek za evropske integracije i međunarodnu saradnju, stručna suradnica.

Takodjer su učestvovali Marina Bera, Federalno ministarstvo zdravstva, pomoćnica ministra i Begzudin Ahmetović, dr. sci, zaposlenik Javne zdravstvene ustanove ZC Brčko, predstavnik Odjela za zdravstvo i ostale usluge Brčko Distrikta BiH, kao i Ismeta Dervoz, zastupnica u predhodnom mandatu PSBIH.

Predsjedatelj Isaković je u uvodu objasnio razloge sazivanja sastanka, te izrazio žaljenje zbog neučestvovanja predstavnika Ministarstva zdravlja i socijalne zaštite republike Srpske, koji su svoj stav iskazali pisanim putem. Cilj sastanka je da damo ocjenu o neophodnosti donošenja zakona, kako bi Povjerenstvo kao predlagatelj u daljoj parlamentarnoj proceduri imalo u vidu i stav zainteresiranih institucija, nadležnih za njegovu provedbu kao i za izradu entitetskih i zakona Brčko Distrikta. Naveo je argumente zbog kojih smatra neophodnost donošenja krovnog zakona, kao i zbog čega ne stoje prigovori entitetskih ministarstava po kojima je ovo pitanje isključivo u entitetskoj nadležnosti.

Pobrojao je i da je nadležnost entiteta i Brčko Distrikta prema ovom zakonu: osnivanje stručnog tijela za vođenje postupka i odlučivanje o pravu na liječenje primjenom postupka MPO-a; propisivanje postupaka i kriteriji procjene darivalaca spolnih ćelija, postupci uzimanja spolnih ćelija, postupci njihovog zaprimanja i pohranjivanja; odlučivanje o dostupnosti podataka o darivaocu; propisivanje i vođenje registra o korisnicima MPO-a, o darivaocima sjemenih ćelija i darivateljicama jajnih ćelija; certificiranje ovlaštene zdravstvene ustanove za postupke MPO, te da će sve to biti uređeno entitetskim zakonima.

Na državnoj razini je isključivo: nadzor nad primjenom Zakona / Ministarstvo civilnih poslova BiH; nadzor nad zaštitom ličnih podataka / Agencija za zaštitu ličnih podataka u Bosni i Hercegovini, te propisivanje i vođenje Jedinog registra svih postupaka MPO-a za područje Bosne i Hercegovine i Jedinog registra ozbiljnih neželjenih pojava i ozbiljnih neželjenih efekata / Ministarstvo civilnih poslova BiH.

Gdja Dervoz, kao kreatorica zakona, objasnila je razloge zbog čega je pristupila izradi Zakona, te način na koji je Zakon koncipiran i zahvalila Povjerenstvu na spremnosti da preuzme tekst kao predlagatelj.

Gdja Bera je u izlaganju ponovila razloge zbog kojih smatra Prijedlog neustavnim sa stajališta nadležnosti, kako je to navedeno i u pisanom mišljenju Ministarstva.

Navela je da se ovim ulazi u organizaciju zdravstvene službe i nameću financijske obveze Federaciji BiH, kao i da u ovom entitetu postoji mogućnost financiranja pokušaja MPO kroz Osnovni paket zdravstvenih usluga i kroz Vertikalni program solidarnosti.

U svojoj diskusiji gdje Gasal-Vražalica i Zelenika insistirale su na postojanju ustavnog osnova za Zakon sadržan u odredbi iz člana II. 3. (j) Ustava BiH, kojim je utvrđeno da sva lica na teritoriji Bosne i Hercegovine uživaju ljudska prava i osnovne slobode iz ovog člana stav 2., što uključuje: (j) pravo na ženidbu i udaju, te osnivanje porodice.

Naglasile su odsustvo zakonske legislative u ovoj oblasti, te obzirom na to da je u entitetima ova složena materija regulirana podzakonskim aktima, što zasigurno nije dovoljno i zbog pravnih praznina ostavlja veliku mogućnost za arbitrarnost u odlučivanju, kao i zloupotrebu, predlagatelj smatra da je neophodno ovu oblast urediti prvo okvirnim zakonom na državnom nivou.

Gdja Gasal-Vražalica je navela i primjer postojanja zakona o sportu i o srednjem i visokom obrazovanju na državnoj razini, a i ove oblasti su na entitetskoj, odnosno kantonalnoj razini.

Takodjer je zamolila da u mišljenju Ministarstva civilnih poslova BiH budu navedene i svi međunarodni dokumenti koji obvezuju na zakonsko reguliranje ove oblasti.

Gdja Zelenika je komentirala činjenicu da, iako je liječnica, po prvi puta čuje za reguliranje prava na MPO u Federaciji na ovaj način, što znači da parovi kojima je ova vrsta medicinske usluge neophodna teško mogu saznati, a još teže ostvariti svoje pravo na potomstvo, čime se još više pokazuje opravdanim donošenje ovog zakona.

g. Begzudin Ahmetović je objasnio da je oblast MPO u Brčko Distriktu regulirana odlukom Upravog odbora Fonda zdravstvenog osiguranja, te je njegov osobni stav da to nije adekvatno i ne vidi razloga zbog čega ne bi bio donesen zakon o kome danas razgovaramo.

U daljoj raspravi gdja Bera je problematizirala i proceduru heterologne oplodnje, za koju je neophodno provesti komplicirane i skupe pripreme, za koju još uvijek nismo spremni.

Povjerenstvo je iskazalo spremnost da u tom smislu korigira Zakon, ukoliko će to značiti pozitivan stav Federalnog ministarstva zdravstva.

Gdje Draženka Malićbegović i Šerifa Godinjak smatraju da je, sa stajališta europskih direktiva, u kontekstu BiH kandidature za EU, potrebno donijeti Okvirni zakon, te će u mišljenju Ministarstva uzeti u obzir tu činjenicu kao i stavove entitetskih institucija i Brčko Distrikta.

Na kraju sastanka, koji je završen u 15,15 sati, predsjedavajući Isaković je zahvalio prisutnima na učešću i izrazio nadu da će biti pronadjeno rješenje da Prijedlog okvirnog zakona o liječenju neplodnosti biomedicinski potpomognutom oplodnjom bude usvojen.

TAJNIK POVJERENSTVA

Davorin Semenik

\* Audio zapis sastanka je priložen uz zapisnik.

